



Daripada Anas bin Malik RA, sabda Rasulullah SAW:

Maksudnya: "Menuntut ilmu adalah fardu atas setiap orang Islam, dan penuntut ilmu akan di doa keampunan oleh semua termasuk ikan-ikan di lautan."

Riwayat Ibn Abd al-Bar dalam *Jami' Bayan al-Ilm wa Fadhluh* (1/7). Hadis ini hukumnya hasan dengan jumlah jalan dan syawahidnya

Pedoman dan Iktibar Hadis



Antaranya:

1. Ketahuilah bahawa ilmu lebih utama daripada amal. Amal ibadah tidak diterima kecuali dengan ilmu. Ibn Ruslan dalam kitab *Zubad*nya menulis syair yang bermaksud:

Setiap orang yang beramal tanpa ilmu, Maka amalnya ditolak dan tidak diterima.

2. Ilmu pengetahuan adalah kawan yang setia ketika sepi, pembimbing ke jalan petunjuk agama dan modal dalam perjuangan untuk mendapat kemuliaan



di dunia dan akhirat. Orang yang malas mencari dan menambah ilmu pengetahuan bagaikan lampu kehabisan minyak dan dia akan hidup dalam kegelapan. Hidup akan cemerlang jika dibekalkan dengan ilmu pengetahuan.

3. Kelebihan ilmu pengetahuan:

- Ilmu adalah warisan para Nabi AS sedangkan harta adalah warisan Firaun dan Qarun.
- Ilmu lebih mulia daripada harta kerana ilmu menjaga manusia sedangkan harta dijaga oleh manusia.
- Orang yang berilmu mempunyai ramai kawan sedangkan banyak harta banyak pula musuhnya.
- Ilmu diberikan bertambah, harta diberikan berkurang.
- Ilmu tidak boleh dicuri, sedangkan harta boleh hilang dan lenyap.
- Harta boleh habis sebelum pemiliknya mati, sedangkan ilmu habis dengan kematian pemiliknya.
- Ilmu tidak dapat dihitungkan, sedangkan harta dapat diketahui jumlahnya.
- Allah SWT akan mengangkat darjat orang-orang yang beriman dan orang-orang yang berilmu sebagaimana firman-Nya:

Maksudnya: Wahai orang-orang yang beriman! Apabila diminta kepada kamu memberi lapang dari tempat duduk kamu (untuk orang lain) maka lapangkanlah seboleh-bolehnya supaya Allah melapangkan (segala halnya) untuk kamu. Dan apabila diminta kamu bangun maka bangunlah, supaya Allah meninggikan darjat orang-orang yang beriman di antara kamu, dan orang-orang yang diberi ilmu pengetahuan agama (dari kalangan kamu) - beberapa darjat. Dan (ingatlah), Allah Maha Mendalam Pengetahuan-Nya tentang apa yang kamu lakukan.

(Surah al-Mujadalah: 11)



- 4. Al-Jahiz berpesan supaya banyak membaca agar dapat mengusir kesedihan yang kamu rasakan. Beliau berkata: Buku adalah teman yang tidak dapat mengusirmu, sahabat yang tidak menyesatkanmu dan sahabat yang tidak memberatkanmu. Buku adalah seperti orang yang tidak dapat meletihkanmu, tetangga yang tidak membuatmu kesal, sahabat yang tidak ingin mengeluarkan apa yang anda miliki dengan rayuan, tidak memperlakukanmu dengan tipu daya, tidak menipu anda dengan kemunafikan, dan tidak memperdaya anda dengan pembohongan.
- 5. Buku merupakan barang yang jika anda melihatnya, maka akan semakin menambahkan kesenanganmu, buku dapat mengasah otakmu, menyederhanakan pembicaraanmu sehingga mudah difahami, dapat memperbaiki tugas-tugasmu, mengagungkan ucapanmu, menjadikan dirimu nyaman, memanjangkan umurmu, menghadiahkan penghargaan besar bagimu dari orang awam, dan dapat menjadikanmu sebagai kepercayaan penguasa.
- 6. Dengan buku, dalam jangka waktu sebulan anda dapat mengetahui sesuatu hal yang tidak dapat anda ketahui dari orang lain selama hidupmu. Dengan buku kamu selamat dari kerugian, kerja keras, dan berlama-lama menunggu pelajaran yang sebenarnya dapat kamu pelajari sendiri. Dengan buku kamu akan menjadi orang yang paling mulia akhlaknya dan paling mulia keturunannya di antara orang-orang yang ada disekitarmu. Anda juga akan selamat dari orang-orang yang membenci anda ketika anda duduk bersama mereka.
- 7. Manfaat membaca dan mengkaji sebuah buku:
 - Menghilangkan perasaan was-was, gelisah dan sedih.
 - Menjauhkan seseorang dari berbuat kejelekan.
 - Dapat menyibukkan diri seseorang dari kegiatan para penganggur.
 - Memperbaiki dan melatih ucapan seseorang, menjauhkannya dari kesalahan berbicara dan menghiasinya dengan kata-kata yang indah ketika berbicara dengan orang lain.
 - Mengembangkan akal, meningkatkan pemikiran, dan menjernihkan hati.
 - Dengan membaca seseorang dapat memperolehi ilmu yang berlimpah serta pelbagai pemahaman dari satu masalah.



- Dapat memperolehi manfaat dan percubaan yang dilakukan oleh orang lain dan kesimpulan para ulama.
- Dengan membaca dapat membentuk kemampuan untuk memecahkan suatu ilmu yang masih menjadi perkara misteri di samping menelaah kebudayaan-kebudayaan yang berpengaruh terhadap kehidupan manusia.
- Dapat menambahkan keimanan, terutama ketika membaca buku-buku yang berkaitan dengan Islam. Ini kerana, buku itu seperti penasihat, pemberi peringatan yang terpenting, pencegah yang terbesar dan hakim yang paling adil untuk memutuskan sesuatu perkara.
- Kitab dapat menyelamatkan fikiran manusia dan ketidak beraturan, menyelamatkan hati dari kehancuran dan menyelamatkan masa dari kesiasiaan.
- Dengan membaca, seseorang dapat menetapkan suatu kalimat yang diambil, dipakai, membentuknya, mengetahui maksud dari suatu ibarat dan dapat mengetahui rahsia-rahsia hikmah yang terkandung di dalam suatu bacaan.

Contoh tokoh-tokoh ilmuan Islam

- Ibn Khaldun yang membawa panji-panji ilmu sejarah, sains sosial dan pembangunan kepada manusia.
- Abu Zakaria al-Razi yang membawa panji-panji ilmu kedoktoran kepada manusia.
- Ibn Sina yang membawa panji-panji ilmu falsafah dan kedoktoran kepada manusia.
- Syarif Idrisi yang menyumbangkan panji-panji ilmu geografi.
- Abu Bakar al-Khawarizmi yang membawa panji-panji ilmu falak dan matematik.
- Ali bin Haitham yang membawa panji-panji ilmu sains tabie dan optik.
- Abu Qasim Zakhrawi yang memartabatkan panji-panji ilmu pembedahan.
- Abu Zakaria Awwam yang memuncakkan panji-panji ilmu tumbuhtumbuhan.



- Abu Bana' yang membawa panji-panji ilmu hisab.
- Abu Raihan al-Bairuni yang membawa panji-panji ilmu sejarah klasik dan kesan-kesannya.
- Imam al-Ghazali yang menjulang panji-panji ilmu kritikan, pendidikan dan menyelesaikan kerosakan jiwa.
- Imam Malik, Abu Hanifah, Syafie dan Ahmad bin Hanbal yang mempelopori panji-panji keutamaan fiqh dan undang-undang.

Terdapat lima kemahiran yang amat perlu bagi generasi pelajar membangunkan dirinya supaya mampu menjadi modal insan yang menyumbang ke arah pembangunan negara dan pembangunan umat manusia. Selama ini kita menjadi umat pengguna dan umat penciplak terhadap keunggulan orang lain. Kita belum mampu menjadi umat penyumbang terhadap pembangunan umat dan pembangunan umat manusia.

Oleh itu, beberapa asas kemahiran yang penting dan utama perlu dikuasai oleh umat Islam atau pelajar di samping memiliki kecemerlangan akademik. Asas kecerdasan berfikir (IQ) harus dapat diseimbangkan dengan keteguhan emosi (EQ) dan menjadi ketangkasan rohaniah (SQ) sebagai pedoman utama dalam melakukan sesuatu amal:

- Kemahiran ilmu mengurus diri dan ilmu mengurus sistem.
- Kemahiran berfikir.
- Kemahiran berorganisasi.
- Kemahiran berstrategi.
- Kemahiran berkomunikasi.



Mutiara Hikmah



- Pujangga berkata: Perpustakaan peribadi anda adalah kebun yang rendang dan taman yang penuh dengan bunga-bunga di sekitar rumah anda. Nikmatilah kebun dan taman itu bersama dengan para ulama, para bijaksana, para sasterawan dan para penyair.
- Sayidina Ali berkata: Manusia ada tiga jenis, seorang alim rabbani (yang takut kepada Allah SWT) dan seorang murid (pelajar) yang ingin selamat, dan selain itu rakyat jelata pengikut tiap suara seruan, condong mengikut arah angin. Beliau juga berkata: Ilmu lebih baik dari harta. Ilmu menjaga dirimu, sedangkan kamu menjaga harta, dan ilmu bertambah jika disiarkan sedang harta berkurangan jika dibelanjakan. Dan ulama itu akan tetap hidup selamanya meskipun jasadnya tidak ada, dan ajaran mereka selalu diingat dalam hati.

Kisah Teladan



Keluasan ilmu agama dan perhatian yang mendalam terhadap Sunnah Rasulullah SAW, dengan izin Allah, telah membuka rahsia alam Malakut kepada Abdul Qadir al-Jailani. Beliau telah sampai ke martabat di mana perbezaan di antara hak dengan batil, ilham Ilahi dengan bisikan syaitan, telah menjadi perkara yang sebati dengan jiwanya.

Beliau telah memperolehi ilmu *yaqin* bahawa syariat Nabi yang terakhir adalah sempurna dan tidak boleh diubah, dan bahawa apa jua dakwaan yang berlawanan dengan hakikat tersebut adalah bisikan syaitan semata-mata.

Abdul Qadir sendiri menyebutkan suatu peristiwa yang berlaku pada dirinya. Beliau berkata: Pada suatu ketika, saya ternampak suatu cahaya terang benderang yang memenuhi seluruh langit. Kemudian suatu bentuk manusia kelihatan di dalamnya dan ia berkata: Wahai Abdul Qadir, akulah Allah, Tuhanmu. Aku telah menghalalkan segala perkara yang haram bagimu. Saya menjawab: Berambuslah wahai syaitan. Sebaik sahaja saya mengucapkan kata tersebut, cahaya di langit tadi bertukar menjadi gelap dan bentuk manusia itu mendesir menjadi asap.

Kemudian saya terdengar seorang berkata: Wahai Abdul Qadir, aku telah

menyesatkan tujuh puluh Ahli Sufi dengan cara ini, tetapi Allah telah menyelamatkan kamu disebabkan ilmu dan takwamu. Mendengar kata itu, saya pun membalas: Tidak. Itu cuma rahmat Allah SWT. Sesudah Abdul Qadir menceritakan peristiwa tersebut, salah seorang pendengar bertanya: Bagaimana kamu tahu bahawa itu adalah syaitan? Ketika dia berkata bahawa dia telah menghalalkan bagi saya perkara yang haram. Jawab Abdul Qadir. Beliau selalu memberitahu muridnya bahawa apa-apa amalan yang bercanggah dengan suruhan Allah, maka sudah tentu itu adalah amalan daripada syaitan. Dalam hal demikian, hendaklah seseorang kembali kepada ajaran syariat, mengukuhkan iman dan melawan kecenderungan nafsu dengan bersungguh-sungguh. Apa jua yang tidak dibenarkan oleh syariat sudah tentu menyesatkan.

